

1 Timoti

Pas mami Por ai Timotimbo sürü papimarandi

1 ¹Ro Por Sisas Kraisindi hoafi sahamindi ha-rihandeimb-anahi. God sihefimbo aboedamboreamuni-randeimbi asu Sisas Krais ranahambo anihondümbo-rihurühi himboayefi aiyafani wambo hoafi semindi homböhünda kafoarine hiniŋgi-marineandiri. ²Timoti, wandi süngumboyo se anihondümbo-mariwori asu se wandi nimori hondü nahurai-anafi. Pas nda sihambo sürü papirihi koarariheheandi. Ape God asu ahandi nimori Sisas Krais ai sihambo moani hipoambondine hohoanimo-ndinanihü ŋgusüfoambe afurife küfimbi hohoanimo mbisabinanin-amboane.

Tikai yamundife hoafi ra raguanambo-ndihumboane

³Ro Masedonia hifina hahühi asu sihambo Efesus ŋgoafihü mbinimbafa sahehea hoafimehanini ranane asukai haponda sihambo hoafehanini. Se ranihü nimbafimbo nindou bidifiri ai tikai hoafi süngufe hohoanimo yamundarundüri ra yowani mbisafipuri saheheamboyahi hoafimehanini. ⁴Rananimbo se hoafindafi-ndürani ai ŋgiri tikai hoafindei asu ahei hürütühoafi, ahurihoandi ndürimbo türüfoefe ho watapori hohoanimo ra mbisihehind-amboane. Iŋga yahurai yamundife hoafi ana simbori hoafi tüküfe arandi, ŋga asu rani hohoanimo ranai ana ŋgiri aheimbo Godimbo anihondümbofihü ahandi ratüpuri fifirifembohünda fandihendüri, ŋga wani. Iŋga anihondümbofe hohoanimo yanggiri randeamboe. ⁵Ro ŋgusüfo pefe hohoanimo botifembohünda hoafi ra hoafayahanini. Iŋgusüfoambe sürühoeimbi hohoanimo, Godindi himboahü hüti-koateimbi hohoanimo asu anihondümbofe hohoanimo muŋguambo ra ŋgusüfo pefe hohoanimo nimindih-ane.

⁶Asu nindou bidifiri ana hohoanimo ranahambo muŋguna daboadanamborihi hehimboanei, asu hihindi watapori ranahambo

yanğiri hohoanimoyei hei arihündi. ⁷Aiana Godindi ahinümbi hohoanimo ranahamboanemo yamundihu-rihundeimbi-ndefimbo mehomo. İğga ai ahamundi hoafi ranahandi nimindihündi asu ai ranani moatükunimbo anihondümboanefi hoafayefi mehomo ra moai fifirundi.

⁸Sihiri yarihu fifirihundi God ai nindou-yafe hohoanimo diboadofembo-hündambo ahandi ahinümbi hohoanimo hiniğgimareandi. Asu nindou ai ahinümbi hohoanimo ranahandi ratüpuri hondü rawarihindi ana, ra aboed-ane. ⁹İğga sihiri ndanahambo ndondihu yandihu fifirindihumboane: God ai nindou aboedi ranaheimbo-yopoani ahinümbi hohoanimo hiniğgimareandi, ıgga wani. Ndani-moatükuni ranana nindou ai ahinümbi hohoanimo gogonimbirihehi-ndeimbi, bogorimboyafu-ndeimbimbo hifinambo-rihipureimbi, Godimbo daboadanambo-rihoreimbi, moaruwai hohoanimo süngurihi-ndeimbi, Godindi hohoanimo ana ambe sei-rihündeimbi, hifi ndanihünda hohoanimo süngufemboane seimbi, boagirambo hifikoarihindüri-rihündeimbi asu nindou hifikoari-hindeimbi muğguambo ranaheimbo God ai ahinümbi hohoanimo hiniğgi-mareandi. ¹⁰Asu nimorehi sisihimoyeimbi, nindowenihi bogo moaruwai hohoanimoyomo-rundeimbi, nindoumbo hümbühüniyomo sowandümo homo kaki fihimbo koarihounundeimbi, tikai hoafiyei-rihündeimbi, asu moani hoanğirihi hehi nimoamo nda sei-rihündeimbi, yamundife hoafi aboedi ranahambo daboadi hihirihindeimbi, nindou muğguambo ranaheimbo God ai ahinümbi hohoanimo ra hiniğgi-mareandi. İğga ahinümbi hohoanimo ndanana rani-moatükuni, asu amuri moaruwai hohoanimo aho ranai aboedi hohoanimo ranahambo gabudeamboembo-hünda gifembo-hündamboane. ¹¹Hoafi hondü ranana aboedi hoafi God ai wandı warihü masendi rani-dibo simogod-ane. Hoafi aboedi ranahambo aboed-ane asei asu God ai hihifi-hihifi hohoanimo nimindihayu ra hoafimemuni.

Por Godimbo hihifarüri

¹²Sihefi Adükari Sisas Krais ai wambo hohoanimo-yundirühi, wandı ratüpuri nda wudüpoaponde randeambui yahuhaya, wambo ahandi-mayo ıgginindi ra masendira-mboanahi, asu ro ranahambo hihifarihüni. ¹³Yini, ro horombo ahambo hoafiyahandowohü tirifoarihinihi moaruwaimbo-rihinühi ahambo hürütumarihüni, ıgga ro ahambo anihondümbofi asu fifirifekoate manimboaha ranimboyu ai wambo hipoambo-mareandiri. ¹⁴Adükari ranai wambo hipoambo-mareandiramboyahi, ro Sisas Krais-dibo animboahi. Raniyu wambo anihondümbofe asu hipoambofe hohoanimo afindi masendiri. ¹⁵Hoafi nda anihondü hond-ane asu muğgu ai anihondümbo-mbirihind-amboane. Sisas Krais ai moaruwai hohoanimoyefembü sihefimbo aboedambo-femunimbo makusu, ıgga moaruwai hohoanimoyei-rihündeimbi

ranaheimbo muŋguambo ŋgasündi-heandürimboanahi. ¹⁶Ŋga Sisas Kraisi ai moaruwai hohoanimoyeimbi himboana wamarandüri hu ra nafuimbohünda ŋgasündihearü hehea moaruwai hohoanimoyarihandeimbi wambo boatei hipoambo-mareandiri. Nindou didiyei Kraisiimbo anihondumbo-ndihorani asu süngunambo koadürümbo-koadürümbo yanggiri ŋngombo semindimboayei ranaheimbo ro sisami nahurai-anahi. ¹⁷Aiana Bogori adükari hondü koadürümbo-koadürümbo nüngumboani. Aiana yifikoateyu-randeimb-ani, asu ahambo nindou ai hoeife-koateyu-randeimb-ani. Ai mam-ani God hondayu asu ahambo ndüri adükarümb-ani asu ai koadürümbo-koadürümbo bogori hond-ani mbisefimboane, ŋga anihond-ane.

Timoti ai ŋginindi nüngumbo yifiarimbiyu-wamboane

¹⁸⁻¹⁹Timoti, se wandi nimori nahurai-anafi. Horombo Godindi hoafi hoafiyu-randeimbi ai sihambo nini-moatükuni süngunambo refemboayafi ranahambo hoafimayu asu ro hoafi ranahambo hohoanimoya hehea, haponda se randowandi asahanini. Se hoafi ra ŋginindi kikihindandifi nimbafimbo-animbo asu sihafi ŋgusüfoambe hütikoate-ndafühi anihondumbo-ndiworühi moaruwai hohoanimodibo yifiarimbohünda tiŋirifondafi. Nindou bidifiri ahei ŋgusüfoambe ra moaruwai-ane asei, ŋga ranahambo raguanambo-marihindi ranimboane asu ahei anihondümbofe hohoanimodibo ra mahanondüri sip ho nimoeifihi tirimondeandühi himoni ahano nou. ²⁰Nindou yimbu yahurai-anafani ahafandi ndüri Himeneus, Areksander ahafanimbo ro Satanindi warihumariheapiri. Nindou yimbu ai randafineandühi karini asu ai Godimbo tirifoefe hoafikoate-mbeyafanda sahehea.

Godimbo didibafife hohoanimodibo

2 ¹Boatei se anihondumbo-rihindeimbi aheimbo hoafindafindürühi animboya, se nindou muŋguambo fehefe-ndürimbohünda Godimbo didibafi-ndahindowohü hihifindihori, mbisafi. ²Adükari bogorimbo-yafundeimbi, asu muŋguambo gafman ranahambo-hündambo Godimbo hoafimbeyafindo-wamboane sihiri aboedi nimarimbohünda. Rananimbo asu sihiri Godindi hohoanimodibo süngundihu nindou hohoanimodefi ŋgefimboane. ³Sihiri hoafi yahurai hoafayef-animbo ra aboed-ane asu God sihefimbo aboedamboreamuni-randeimbi ai ranahambo yifirayu. ⁴Ai nindou muŋguambo aboedambo-ndiheandürühi asu anihondü hoafi ra fifirimbi-rihinda yahumboani. ⁵God mam-ani asu hoafi semündü hu semündü hu-randeimbi nindou mam-ani. Aiani God asu nindou sowana hoafi semündü hu semündü hu arandi. Nindou ra Kraisi Sisani. ⁶Ai muŋguambo nindou aboedambofe-ndürimbohünda ahandi fi Godimbo masagado. Nini-simboaniyo God ai yifirimayu ra ai nindou

aboedambo-fendürimbo yahumboani sihefimbo nafuimbohünda Kraisi ahandi fi masagado. ⁷God aiyu ahandihoari rani hoafi ra semindi ho Suda-yafe ndifombo bokarihefe-ndürühi yamundife-ndürimbo kafoare hiniŋgi-mareandiri. Ranahambo ro tikariheambo-yahipoani, ŋga anihondümboanahi hoafayahi. Rananimbo Suda-yafe ndifo ai Kraisisimbo anihondümbo-rihorühi asu anihondü hohoanimo fifirimbirihind-amboane.

⁸Muŋguambo nindowenihi ŋgoafi-ŋgoafi ranihünda ai wari botirundühi didibafimbemonda sahehea hohoanimoayahi. Ai sürühoeimbi niŋgomombo asu simbori hoafikoate-ndimondühi Godimbo didibafindafundi.

Nimorehi-yei hoaf-ane

⁹Nimorehi ai hoeari ndorihoayo-weimbi güdühindühi afind-afindi-koate asu ahei fi hifinambo-ndihindi. Ai ahei mbirinaŋi didiboadofe yihuru asu gorinambo nafiru-ndeimbihündi ranambo fi yihuru-ane asu hoeari kaki adükariŋihi semindümbi yihuru-ane ra moeisahi.

¹⁰Ŋga nimorehi ai Godindi hoafi süngumbo seimbo ana, ai ratüpuri aboedi ratüpurimbeyei-amboane ranane nimorehiyei yihuru hondayo.

¹¹Nimorehi ai hifandi-rundeimbi-yomondi hoarehindeihi sisikoate nimandeimbo Godindi hoafi himborimbeyei-amboane.

¹²Ro ŋgiri hiniŋgi-ndiheandüra nindowenihambo hibadühüpuri asu Godindi hoafi yamundihipuri ndühündi, ŋga wani. Ŋga nimorehi ana moani sisikoate nimarimbo Godindi hoafi himborimbo yaŋgir-anei.

¹³Nimboe sapo God ai Adamimbo boatei nafirüri mburamboyu, asükaiyu süngunambo Ifimbo nafimarandi.

¹⁴Ŋga asu Adam ai moai tikai hoafi ranahambo anihondümbo-reandi, ŋga wani. Nimorehi aiyu tikai hoafi ranahambo anihondümbo-mareandi raniyo asu ai moaruwai hohoanimomayo.

¹⁵Ŋga nimorehi ana nimori wakemindi ratüpuri ratüpurimbeyei-amboane. Asu ai yarihindühi Godimbo muŋguambo si aho ra anihondümbo-rihorühi, nindowambo hipoambofe hohoanimo ra süngurihündühi, sürühoeimbi hohoanimoyeihi asu ahei fi hifinambo-arihindi ana, God ai aheimbo aboedambo-ndearümbui.

Kraisindi nendambo hifandi-rundeimbi-yomondi hoafi

3 ¹Hoafi nda tikaiyopoani, ŋga anihond-ane: Nindou düdi ai Kraisindi nendi aheimbo hifandiyondürimbo hohoanimoayu ana, asu ai ratüpuri aboedi ranahambo yifiriyu hayamboani. ²Hifandirandüri-randeimbi nindou bidifiri ai ahandi moaruwai hohoanimo nimarikoate-ayo ranahambo türüfoefe hoefekoate-mbiyei-amboane. Asu moani nimorehi mami semündümb-animbo mbünüŋgu-wamboane. Nindou ranai ahandi fi diboadore hifandimbirand-amboane asu ndore nüŋguani nindou

ai ahambo aboed-ani mbisei-amboane. Asu nindou ahandi worina tükehindi ra ndore hifandimbirandür-amboane. Asu ai aboedi yamundea-ndeimbimbiyu-wamboane. ³Asu ai ngiri bia afindi ndümündü asu ai ngiri harimbo hohoanimondu, nga himboari hoafendühi simbori hoafikoate nindoumbiyu-wamboane. Asu aiana ngiri kaki afindi semindimbo hohoanimondu. ⁴Ai ahandi aborüdi ranaheimbo didiboado-ndearühi asu nimoakidibou ai ahambo ahiniyeihi ahandi hoafi himboriyeihi süngumbirihind-amboane. ⁵Nindou ranai ahandi aborüdi ranaheimbo didiboadofekoate-ayu ana, asu ai nüngunde Kraisindi nendi ranaheimbo hibadimandandüra? ⁶Anihondümbo-reandeimbi nindou simbori aiana nimai hifandi-randeimbimbofe-poanisi, nga ai ahandi fimbo borindu asu God ai ahambo Satanimbo ramariri nou tijirifo dagadombui. ⁷Ngga nindou düdi Godindi hoafi himborikoate-mayei ahei mbusümo aboedi mbumundi anüngu ai-animbo hifandi-randeimbimbofi mbimaru-amboane. Ngga asu nindou ranai ahei himboahü mbumundi ningokoate-ayu ana, asu nindou ranai yihoaruko-ndihorani asu Satanindi andürambe keboembui.

Kraisindi nendi-yei ratüpuriyomo-rundeimbi-yomondi hoafi

⁸Mami yahurai-ane Kraisindi nendi-yafe ratüpuriyomo-rundeimbi amboani ai ahamundi ratüpuri ranahambo ndondu hohoanimo-mbemondamboane. Nindou ranai ngiri afindi bia ndimindimo asu ngiri nümüsi nou moaruwai hoafindimo aboedi hoafindimo ndundi. Asu ai ngiri nindou bidifiri-yeimayo kaki semindirambo hohoanimondimo. ⁹Rananimbo asu ai Godindi himboahü hütikoate-yomondühi anihondümbofe hohoanimo dibo megoro God ai sihefimbo nafuimayu ranahambo kikihisafi-mbirundimund-amboane. ¹⁰Weangurühi ahamundi hohoanimo ranahambo yandu hoeindundani, asu rani hohoanimo aboedi mbumundi ngoan-animbo asu se ahamumbo ratüpuriyomo-rundeimbimbo-ndüpuri hiniñgi-mbirupur-amboane. ¹¹Mami yahurai-ane nimorehi amboani ai ahei ratüpuri ranahambo ndondihi hohoanimombeyei-amboane. Ai ngörümbo daboarani hoafindeimboyei. Ai ahei fi hifinambo-ndihindühi anihondümbo ratüpurimbeyei-amboane. ¹²Ratüpuriyomo-rundeimbi aiana nimorehi mami yangiri sowandümondeimbi-mbemon-d-amboane. Asu ai ahamundi aborüdi ranaheimbo ndondundüri hifandimbirandür-amboane. ¹³Ratüpuriyomo-rundeimbi ai aboedi ratüpuri ratüpuremo ana, nindou ranahamundi ndüri aboedi yagodimboe. Rananimbo ai ahamundi Sisas Kraisimbo anihondümbofe ranahambo hoafimbo yihimbokoate-ndimboemo.

Godindi hohoanimo nimindihündi hoafi

¹⁴Timoti, ro sihambo sowana nimehünou sinimbo afindi hohoanimo-ayahahi, nga asu ndani moatükunimbo pas nda sürü paparihandi.

¹⁵Ranimboanahi asu ro nimai sinikoate-ndahani ana, asu se hoafi nda hoeindo hawa aboedi hohoanimi Godindi nendi sihiri sungufemboayo ra fifirindo-wamboyafi. Rani nindou sihiri ana yangiri koadürümbo nungumbü Godindi nendi fandihi arihündi ranaheimbo kambohoani nahurai anihondümbofe hohoanimi ra nginemindi-ndürimboanefi.

Kraisimbo herü

¹⁶Sihiri ndondihu fifirindihumboane, nga Godindi nimindi hoafi hohoanimi ra ndorihoeimbi hamind-ane. God ai dibo-hoafi weindahimareandi ra ndahurai-ane.

Nindou nimorimbofi tüküme fiyuwa hoeimarihori.

Yifiafi Aboedi ai nafuimayo ahandi hohoanimi mbumund-ane. Sünambeahindi nendi ai hoeimarüwuri.

Ahambohünda Suda-yafe ndifoambo hoafi bokamarihomo.

Hifinindi nimorehi nindowenihi ai ahambo anihondümbo-marihori. God ai sünambe serümündü mahafu.

Tikai hoafümbi nendi-yafe hoafi

4 ¹Yifiafi Aboedi ranai wudipoapore hoafiyowohü yahoya: Sungunambo ana nindou bidifiri ai anihondümbofe hohoanimi ra hiningi-ndihimboyei. Asu ai tikai hoafümbi sanendi kabomo ranahei yafambehündi himborindeihi asu ranahei yamundife hoafi ranahambo sungundühimboyei, meho. ²Yamundife hoafi ra tikai hoafiyomorundeimbi-yomondi-mayo hoof-ane. Ahamundi ngusüfoambe hohoanimi ra mamikari-ndapurüh-animbo asu ahamundi moaruwai hohoanimi ranahambo ngiri amoaningi-ndimo ndundi. ³Rani nindou ranai nimorehi semindikoate hohoanimi asu bidifiri sesi wehisaombo hohoanimi ra refemboane mbisimboemo. Nga nindou didiyei ahambo anihondümboarihori asu hoafi hondü fifirarihindi ranai sesi sahüsihi asu ahambo hihifimbohünda God ai sesi ra nafimarand-ane. ⁴Nga asu munguambo moatükuni God ai nafimarandi ra aboed-ane. Nga se rani-moatükuni ranahambo moaruwai-ane mbiseimboyei, nga Godimbo hihifarihori ana, ndahümündi. ⁵Nga asu Godindi hoafi sungu sihefi didibafife hoafi rasungunambo munguambo sesi ra Godindi yangiri tükündifemboe.

Timoti ai Sisasindi ratüpurimbo aboedi mbünungu-wamboane

⁶Asu se ndani hoafi ra wandafi mami ranaheimbo hoafayafindüri ana, asu se Sisas Kraisindi ratüpuriyafi-randeimbi aboedi safi nimboamboyafi. Anihondümbofe hoafi asu yamundife hoafi aboedi ra se sunguaro hafi rani-sungu se nginindi nimandimboyafi. ⁷Asu se hihindi watapori moaruwai ranahambo ana daboadanambo-ndowandi. Nga se Godindi hohoanimi ranahambo yangir-animbo yamundi-yamundi-ndowandi.

⁸Sihefi fi yamundi-yamundife hohoanimo ndanana moani akidou fandihemunimboe. Ŋga asu Godindi hohoanimo süngufembo yamundi-yamundife ra sihefimbo afindi safi fandihemunimboe. Rani-moatükuni animbo yanggiri animboefi ndani-simboani fandihemuni asu süngunambo koadürümbo-koadürümbo yanggiri niŋgombo semindimbo rani-simboani amboani fandihemuni raraondamboe. ⁹Hoafi ra anihondü hamind-ane, nga muŋguambo ra anihondümbo-mbirihind-amboane. ¹⁰Godindi hohoanimo süngufembo ra ratüpuriyefühi hüti-hütiayefi. Sapo ro yanggiri nüngumbü Godimbo anihondümbo-rihurühi himboayefi. Ŋga nindou didiyei ahambo anihondümbo-arihori ranaheimbo aboedambo-reandüreimb-ani.

¹¹Ŋga se nindou ranaheimbo hoafi ra dabadürühi yamundowandüri arandi rananimbo süngumbirihind-amboane. ¹²Ahei himboahü ana se nindou akohoand-anafi, nga asu ai sihamboya aiana nindou yanggir-ani mbisahüninimboyei, nga wani. Ŋga se nindou aboedi mbumundi hamindi nimbafan-animbo, asu anihondümbo-rihindeimbi ai sihafi hoafi, niŋgo, hipoambofe hohoanimo, anihondümbofe hohoanimo asu sürühoeimbi hohoanimo ra sihambo hoeirihinini hehimbo süngumbirihind-amboane. ¹³Ro tüküfekoate-yahambe nindou himboahü Godindi hoafi hoeindo wataporimbo-ndandühi, kikimiboadowa-ndürühi asu ahandi hoafi yamundowandüri ndandi. ¹⁴Horombo hifandi-rundeimbi ai sihambo wari wamini nanduninani God ai ahandi hoafi hoafiyu-randeimbindi hoafi-süŋgu sihambo ranipoani ratüpuri masaganini. Ŋga se ratüpuri ra mbosindamboyafi. ¹⁵Muŋguambo ratüpuri ranahambo sihambo hoafimayahi ra se ndondo hibadandi ratüpuri aboedi ra tüküfembohünda tiŋirifondafi. Rananimbo asu muŋguambo nindou-yei himboahü sihafi hohoanimo ra aboedi tükümbifeyo-wamboane. ¹⁶Se nindou aheimbo yamundaro-wandürane, asu sihafi hohoanimo ranane ranahambo ndondo hibadandi. Se yaro ŋginindi nimbafi. Se randowandühi ana, se-anafi asu sihafi hoafi himboriyeimbi ra muŋguambo aboedambo-ndahimboyei.

Ŋgorü nindoumbo didiboadofe hoafi

5 ¹Se boagiri nindoumbo ŋginindi hoafindamboyafi, nga sihafi apembo hiniŋgirou safi didiboado-arıworı nou-animbo asu ahamumbo amboani randowapuri. Asu akohoandambo amboani sihafi akidambo rawarowori nou rando didiboado-ndowapuri. ²Se nimorehi boagirambo amboani didiboado-ndowandüri sihafi me hondü rawarowandi nou. Asu se yihoarif-amborimbo didiboado-ndowandüri sürühoeyoweimbi hohoanimo süŋgu sihafi rehi hondümbo rawarowandi nou.

Nimorehi kaisahoabediyei hoafi

³Se nimorehi kaisahoabedi ranaheimbo aheiamboa hamindi niboadeia nondondondiworü. ⁴Ŋga asu nimorehi ranai nimoreimbi-ndowohü

ahuirihōandeimbi-ndowanī ana, nīmori ai boatei ahei hōndi asu asari ranaheimbo mbifarihe-hindūr-amboane. Rani hōhoanimō ra Godindi hōhoanimō sūngufe-ane, ŋga yamundowandūri. Asu ai nīmōrehi ranahambo ndōndīhi hibadīhūdūhi horombo moaŋguimarandūri rani-sūngumbo simbori amboani mbifarihe-hindamboane. Rani hōhoanimō ranimbo-ani God ai yifirayu. ⁵Nīmōrehi ranai nindowenihambo dīgeri haya ai-yaŋgiri hamindi nīngombo ana, ai Godimbo hibadīrīhū nimbī-nimbisi ahambo fehēfe ranahambo didībafindo pindo nda ŋgomboe. ⁶Ŋga nīmōrehi kai ai moani ahandi fimbo yaŋgiri hōhoanimōyo sūngure arandi ana, nīmōrehi ra yifiyombo nahurai-ane. ⁷Se anihōndūmbo-rihindeimbi ranaheimbo rani hōhoanimō ra randīhindi mbisafan-animbo asu ai ranahambo sūngundūhi ŋgeiani asu nindou ŋgiri aheimbo moaruwai hoafindahūdūri. ⁸Nindou dūdi ai ahandi mamisiri asu ahandi fikiminindi ranaheimbo-poanimbo didīboado-fendūrikoate-ayu ana, nindou ranai anihōndūmbofe hōhoanimō ranahambo daboadi hihireamboani. Ŋga nindou ranai anihōndūmbofe-koateyeimbi ranaheimbo ŋgasūndearū haya ai moaruwai hamindi nūngumbui. ⁹Kaisahoabedi ai 60 himbani ŋgasūndeandeimbi nindowenihi mamī yaŋgiri serimindoweimbi ranahambo aboedi hōhoanimō sūngureandeimb-ane aseī nīmōrehi yahurai yaŋgir-animbo kaisahoabedi-yafe fehēfembo bukambe ndūri pefendūrimboane. ¹⁰Ai aboedi hōhoanimōyo-randeimb-ane mbisei-amboane. Rani-ratūpuri aboedi yahuraimboanahi hoafayahi ai ahandi nīmori ndore hifandīmbirand-amboane asu nindou semindi worinambo-mbireand-amboane, anihōndūmbo-rihindeimbi-yafe tiŋari popoai-mbīrihend-amboane, nindou tiŋirifo tūkūndīfeyoani mbifarihendūr-amboane asu muŋguambo aboedi ratūpuri aho ra rambireand-amboane. ¹¹Ŋga se kaisahoabedi akidou nīmori safi aheimbo fehēfembohūdambo ahei ndūri pandowandūrimboyafi. Ai hoafindeihi animboya, ‘Ro Kraisindi ratūpurimboanefi’ mbisei hehi, asu ahei fimbo yaŋgiri hōhoanimōndeihi anamīndi ŋgorū semūdūmbo mbisei hehi Kraisindi ratūpuri ra hiniŋi-ndīhimboyei. ¹²Asu sapo ai nini-moatūkuniyo horombo hoafiyeihi randīhumboyefi masei ra refekoate-ayeī ana, ai hūtindeimboyei. ¹³Asu ai ŋgorū hōhoanimō yarihi arihūndi ra ratūpurikoate-ndeihi moani worini-worinindeimboyei. Asu ratūpuri-koate yaŋgiri-poani, ŋga ai bodimondambo hahabodeihi daboadani tehūndīhūdūri asu bidīfiri-yafe moatūkuni ranahambo sefe fehēfendūri nini-moatūkuni ai hoafikoate-mbomayo ra wataporimborihū arihūndi. ¹⁴Ranimboane kaisahoabedi akidou nīmori safi aiana asūkai anamīndihū-mbeyahind-amboane asahi. Rananimbo nīmori wakīndihūmūndi mbūndihūmbo asu ahei wori ra hibadīhūndi. Randahindan-animbo nindou ai ŋgiri ahei moaruwai hōhoanimō hoeīndīhindūhi asu moaruwai hoafindei. ¹⁵Ŋga

nimorehi bidifiri ana ai daboadi hihiriyahi hehimbo asu Satanindi süngu heimboanei. ¹⁶Nimorehi anihondumbo-reandeimbi, nimorehi kai mami ahandi worambe ai-dibombo aniŋgo ana, nimorehi ranai ndonde hibadandi. Sapo nimorehi kai ranahambo ana anihondumbo-rihindeimbi ai ŋgiri ahambo hibadindhündi ranimbo-hünda. Ŋga nimorehi kai didiyei nindou ŋgorü ai-amboani hifandiyondüri-koate-ayeï ranaheimbo-animbo anihondumbo-rihindeimbi ai hibandi-hündürimboyei.

Hifandi-rundeimbi nindou ai aboedi ratüपुरi-ndimonda ndondihu hibadihu-purimboane

¹⁷Asu hifandi-rundeimbi ai aboedi hifandarundi rani-süngumbo ahamumbo aboed-anemo mbisahüpurüh-animbo aboedi mbifari-hehipurimboane. Godindi hoafi hoafiyomo asu yamundu-rundeimbi ahamumbo rani-poanimbo hamindi mbifari-hehipuramboane.

¹⁸Sapo nindou ahandi ratüपुरi ranahambo kaki saimbo ranahambo-hündambo Godindi hoafi yare hoafiyowohü yahoya, ‘Burmakau ai wit hipiri fifirihendühi asu safi dedimboe sei hehi yafambe kikihindi-hümindimboyei,’ meho.^a Asu ŋgorü hoafi yahoya, ‘Nindou ratüपुरiyu-randeimbi ranai ratüपुरi rani-süngunambo kaki ndemündümbui,’ meho.

¹⁹Nindou mami ai hifandi-randeimbi ranahambo papi-hoafindürani ana, se ahandi hoafi himbori-ndamboyafi. Ŋga yimbuyafani asu ŋgimiyomo ai hoafindimondan-animbo himborindafi. ²⁰Asu hifandiru-rundeimbi nindou bidifiri ai moaruwai hohoanimo-ndimondani ana, se ranahamumbo hifandiru-rundeimbi-yomondi himboahü hoafindafihü didiboado-ndowapuran-animbo asu hifandiru-rundeimbi bidifiri ai amboani yihimbo-mbeyomondamboane.

Timoti ai ahandi hohoanimo ranahambo ndonde hibadandi

²¹Ro God, Sisas Kraias asu God kafaoreapureimbi sünambeahindi nendi ahamundi himboahü sihambo hoafayahanini, se randowandi masahi mami yahurai hohoanimo-animbo muŋguambo nindou ndondo süngundandi. ²²Ŋga se yowani nindou Godindi ratüपुरi ratüपुरimbohünda kafeofi hiniŋgifiimbo ra nimehünou wari ahandi wami nandowamboya. Se Godindi himboahü mbumundi niŋgombo hibadambo, ŋga ŋgorü ai moaruwai hohoanimoayu ra se ai-dibo mamambe-ndafamboyafi. Ŋga se sürühoeimbi nimbafi ŋgafi. ²³Se hoe

^a 5:18 Por ai hohoanimoyuhü yahuya, Anihondumbo-rihindeimbi ai ahei hifandi-rundeimbimbo kaki-napo mbifarihe-hipur-amboane, mehu. Rani-hoafi ra weindahi-fembohünda ai Baiborambeahindi hoafi hoafimayu. 1 Korin 9:8-12, İo 25:4, Ruk 10.7

yanḡiri ndimindimboyafi, ḡga akidou wain hoe amboani sihafi furi asu anḡüni sowandifi arandi ra farihefe-ninimbohünda ndimindifi. ²⁴Asu nindou bidifiri-yei moaruwai hohoanimo ra aheimbo yibobofekoate-yuambe weindahi adükari tüküfe arandi. Asu nindou bodimondi-yei ai dibomboane enḡoro, ḡga süngunambo weindahi tükündifemboe. ²⁵Mami yahurai-ane aboedi hohoanimo amboani weindahi tüküfe enḡoro. Asu bidifiri aboedi hohoanimo nimehünou weindahi tüküfekoate-ayo ra ḡgiri muḡgunambo dibo yagodo.

6 ¹Muḡguambo anihondümbo-rihindeimbi ḡgorü nindou-yei moani ratüpuriyei-rihüdeimbimbo-yahi animboei ai ahei hifandirundüri-rundeimbi nindou ranahamumbo ahinindeihi ahamundi hoareihimbeyei-amboane. Rananimbo nindou ai ḡgiri Godindi ndüri asu sihefi yamundife hohoanimo ranahambo moaruwai hoafindu. ²ḡga ratüpuriyei-rihüdeimbi-yei hifandirundüri-rundeimbi ranai anihondümbo-rundeimbi aiyomo ana, ai yowani randihi hohoanimondeihiya, ‘Ro mami apodoho nahurai-ane, ḡga ro ḡgiri ahamundi hoafi himborindefi,’ mbisei, ḡga wani. ḡga ai randihi hohoanimondeihi animboya, ‘Nindou ndanahamumbo aboedi fehefembohünda ratüpurayefi nda ai anihondümbo-rundeimbi-memondamboanefi ro ahamumbo hohoanimo pararihupuri,’ mbisei. Se nimorehi nindowenihi aheimbo aboedi hohoanimo ra yamundowandürühi asu rasüḡgufembo ḡgusüfo botindowandüri.

³Sihefi Adükari Sisas Kraisindi hoafi ai sihefimbo Godindi hohoanimo süḡgufembo yamundeamuni arandi. Asu nindou ḡgorü ai yamundife hoafi ra hiniḡgire haya rani-poanimbo hoafi yamundareandüri ana, nindou ranai ahandi hohoanimo ranahambo yanḡir-ani afindi hohoanimoyuhü hoafi himborikoate-ayu. ⁴⁻⁵Aiana fifirife-koate nindou nahurai-anemo. ḡga ai nini akidoumbo ndüri asu nini kaboadihumbo yaho hefe hoafinambo simbori-simbirimbo-anemo mamikari hohoanimoemo. Rani hohoanimo rani-süḡgumboane ndani hohoanimo tüküfe arandi: Nindou ḡgorümbo moaruwaimbofi, simbori-simbiri, tirifoefi hoafi, ḡgusüfoambe nimbiyo asu hoafinambo simbori-simbiri, muḡguambo hohoanimo ra tüküfe arandi. Nindou rasüḡguru arundi ana, ahamundi hohoanimo ra mamikari-rapurühi moai akidou amboani hoafi hondü ra wudipoaporu fifirundi. Ai Godimbo süḡgufe hohoanimo ana aboedi napo semindi nafimbai yahomo houmboanemo. ⁶Anihond-ane, sihiri Godindi hohoanimo süḡguarihundi ana, asu nini-moatükuni God ai sihefimbo semuni arandi ranahambo hihifi-hihifiyefühi aboedi napo nahurai sahumindefi arihundi. ⁷Sihiri fifirihumboanefi, sihefimbo sihefi boagiri ai wakiri-hümündimuni simboani moai nini-moatükuni sahumindefi hoahumbo-yefipoani tükümehundi. Rani süḡgumboane asükai yifayefi amboani ḡgiri nini-moatükuni ndahumindefi ḡgefi. ⁸ḡga

sesi hoeari napo sihefimbo engoro ana, ra ndear-ane mbisefimboane. ⁹Ŋga nindou ai kaki-napo afindi semindimbo hohoanimoayei ana, ninihondi andürambe pirayo nahurai randahimboyei. Ai afindi moaruwai moatükuni refembo hohoanimo-ndeimboyei asu rani hohoanimo rananimbo aheimbo mamikari-ndandürimboe. Rani süngunambo-animbo ai moaruwaimbo-ndahimboyei. ¹⁰Kakimbo hohoanimo pefe ana moaruwai hohoanimo afindi ranahandi nimindih-ane. Nindou bidifiri ai kaki afindi semindimbo hohoanimoeyeih anihondümbofo hohoanimo hiniŋgi-rihindühi afindi hamindi tiŋirifo masahümündi.

¹¹Ŋga Timoti, Godindi nindou-anafi, ŋga se rani-hohoanimo ranahambo feboawandi. Ŋga se mbumundi hohoanimo, Godimbo süngufe hohoanimo, ŋgusüfo pefe hohoanimo, tiŋirifo tüküfeyoani moanane yaho ŋginindi niŋgombo hohoanimo, asu himboari hoafendühi hohoanimo muŋguambo ra se süngundandi. ¹²Nindou Kraimbo anihondü-mboariri ana, sapa nindou napo semindi-mbohünda pipayomo nahurai-ane. Ranimbo-hündamboane se aboedi pipindafi ŋgafimbo yangiri koadürü-koadürümbo niŋgombo ra ndowandifi. Se nimorehi nindowenihimbo sihafi anihondümbofo hohoanimo ranahambo hoafi-mayafindüri ranimbo God ai sihambo hoafiyumboani yangiri koadürümbo niŋgo rani semindimbohünda. ¹³God ai muŋguambo moatükunimbo yangiri niŋgo sai arandi asu Sisas Krai ai Pondius Pairatindi himboahü nüngumbo anihondümbo fifirifoare hoafimayu ahafandi himboahü sihamboya ndahurai randowandi asahi. ¹⁴Sihambo refembo hoafimayo ra hütikoate-ndafihü wudüpoapondo yando ŋgafi Adükari Sisas Krai ai kuduani rananimbo asu ŋgiri hoafi yagodo. ¹⁵Ai weindahi tüküfemboayu ra God ai ahambo tüküfembo hoafimayu rani-süngu tükündifimbui. God aiana aboedi yangiri nüngumb-ani asu ai mamani muŋgu-moatükuni hifandarandi. Aiana muŋguambo bogori nindou-yei bogori hond-ani asu hifandi-rundeimbi-yomondi Adükari hond-ani. ¹⁶Ai mami yangir-ani yifiyo-rakoate-ayu. Aiana si afindi peyoani raniŋih-ani anüngu, ŋga rani-fikimi nindou mami ai-amboani ŋgiri ŋgu. Ŋga asu nindou mami ai-amboani moai horiri asu ŋgiri hondiri. Ranimboane muŋguambo si sihiri ahambo hohoanimo-ndihurani ai muŋguambo ŋginindeimbi-mbiyu-wamboane, ŋga anihond-ane.

¹⁷Nindou hifi ndanihündambo napo afindeimbi ranaheimbo hoafindafindüri ai yowani borindeimboyei. Ai nimehünou moaruwaiyorangeimbi napo ranahambo ŋgiri anihondümbo-ndihindi, ŋga yowani. Ŋga God ai sihefimbo hihifi-hihifimbohünda aboedi moatükuni saimuni arandi ranahambo animbo anihondümbo-ndihurimboane. ¹⁸Napo afindeimbi ai aboedi hohoanimonduhü aboedi ratüpuri afindeimbimbiyu-wamboane asu sai-randeimbimbiyu-wamboane. ¹⁹Ai rasünguarihindi ana, aheimbo süngunambo farihefembo napo gugurihindühi nahurai-ane aiana süngunambo yangiri niŋgo hondü ra ndahümündimboyei.

²⁰Timoti, se God ratüपुरi sihambo masendi ra wudipoapondo hibadandi. Muᅅguambo nimindi fifirife-koate hoafi ranahambo daboadanambo-ndowandi. Nindou bidifiri ai tikarihi hehi hoafiyeihi seiya, 'Hoafi nda nimindi fifireandeimbi hoaf-ane,' mbiseimboyei, ᅅga se hoafi ranahambo himbori-ndamboyafi. ²¹Nindou bidifiri ai rani hoafi rani-süᅅgurihindühi anihondümböfe hohoanmo ra hiniᅅgi-rihimboanei.

Godindi moani hipoambofe hohoanimo ai se-dibo mbeyanᅅoro-wamboane.